

D. O. M.
THESES
EX PHYSIOLOGIA SELECTÆ
PUBLICIS AGITANDÆ DISPUTATIONIBUS
IN SCHOLIS MEDICORUM
ACADEMIÆ CADOMENSIS,
PRO BACCALAUREATUS GRADU CONSEQUENDO.

M. JOANNE FRANCISCO DE LA DUCQUERIE,
Professore Regio, Præsides.



CADOMI,
Ex Typis ANTONII CAVELIER, Regis & Academiæ
Typographi.

M. DCCXV.



THESES EX PHYSIOLOGIA SELECTÆ.

I.

MEDICINA ritè definiatur ars tuenda valetudinis. Subjecta ipsius materies corpus humanum, finis proximus sanitas est. Corporis humani partes solidæ sunt & liquidæ. Solidarum motus *oscillatio* dicitur, quæ in alternâ dilatatione & constrictione consistit. Ejusmodi oscillatio liquidarum influxui ferè tota debetur, & vice versâ liquidarum circuitus solidarum oscillationi; hinc corpus humanum circulus est suis limitibus circumscriptus, multis intus & extus liquoris externi & interni vorticibus actus, quorum omnium principium & finem vix reperiatis. Prima machinæ corporeæ stamina sunt fibrillæ, quæ mirâ texturâ, situ, & ordine, Naturæ totius princeps opus constituunt; fibrillæ cavæ, ductiles, & elasticæ nobis habentur. Inter partes ex iis formatas continentur liquores, quorum motu agitantur, fiunt secretiones, motusque circularis & progressivus continuantur & accelerantur. Omnes præter chylum liquores à sanguine oriuntur, & suam tum à secretionem, tum à fermentationem perfectionem habent. Fermentatio fit conspectu *acidi* cum *alkali*: unde quando illud nimis iners est, quàm ut liquoris meatus penetrare, obices frangere, & intimos recessus subire possit; tunc nulla accedit in liquoribus mutatio. Requiritur ergo quædam salis acidi cum alkalium meatibus proportio; & certè nullû, præter sal acidum, corpus excogitari potest, quod alia dissolvere, ac in minutissimas partes concidere possit. At at liquores coagulat, ita est, modò illi oleosi fuerint; ab illorum enim ramulis salis acidi cuspidem ita implicantur, ut motus omnis sistatur. Secretio est unius liquoris à sanguine sepa-

ratio. Pori & glandulæ secretionum habentur organa. Qui porro fiat, ut succus nervosus per substantiæ corticalis cerebri, succus pancreaticus per pancreatis, bilis per hepatis glandulas coletur. Sunt qui ad id opus nullam requirunt pororum configurationem, contenduntque solum liquoris è corde ad partes extremas sufficere appulsam. At nulla unquam peragetur secretio, nisi liquor secernendus particularum suarum aptitudine cum glandularum poris conveniat, ipseque prius fuerit fermentatus. Sic ergo res sese habet. Dum sanguis ex arteriis per glandulas in venas, trahitur, ejus particulæ quæ figurâ & diametro cum glandularum meatibus conveniunt, per hos separantur, separatæ tubulum peculiarem subeunt, liquoremque constituunt diversum, vel in sanguinem transfundendum, vel foras excernendum: hinc liquorum divisio in necessarios & inutiles, vera est & germana. Per internam oris & palati superficiem plura sunt corpora parum dura, parum densa, è membranâ & canaliculis composita, circa quæ innumeri inseruntur nervi, quorum munus est, ut & salivæ efficitatem promoveant plurimum, & ut ejusmodi corporum venas constringant: quod certè in causâ est, cur sanguis uberius per arterias delatus, in venas non fluat, & longiorem in his corporibus, quæ glandularum nomine appellantur, moram trahens, majorem salivæ copiam suppeditet: hinc etiâ ubi grati aliquid vel olfacimus, vel videmus, copiosior tunc effluit, quia scilicet nervi paris vagi propagines, quæ ad nervos opticos, & ad superiores nares deferuntur, agitari non possunt, quin simili ratione moveantur illæ, quæ ad oris glandulas inseruntur. Quo quidem motu venæ, quarum membranæ nervis circumdantur, angustiores fiunt, ac retardato sanguinis circuitu per glandulas, copiosior deponitur saliva, quæ ex eo quoddam partibus acidis & alkalicis referta sit, fermenti rationem habeat necesse est.

II.

ALIMENTORUM digestio non tritura soli, sed calori & ventriculi fermento accepta debet referri. Si tempus intra quod alimenta, quæ ex naturâ suâ solida sunt, in liquidam substantiam commutentur, queris, eam mutationem in homine sano intra septem horas compleri statuimus. Quando alimenta salivæ particulis saturata, crebrâ linguæ agitatione ex œsophago in ventriculum decidunt, statim contrahuntur ejus membranæ: tunc liquor, qui continenter per glandulas in interiori ventriculi superficie positas secernitur, alimentorum particulas subit, meatus penetrat, mixturæ vinculum solvit, uno verbo crassiores dividit, eò usque dum eam sint præparatam molem, quam chylus desiderat, qui è ventriculo crassus, renax &

viscidus dimanans, & in duodenum, repetitâ ipsius partis contractione propulsus, novam subit mutationem, quam efficiunt bilis & succus pancreaticus, eoque magis quod quandò alimentis turgēt ventriculus, partes ipsi adjacentes comprimat, & utriusque liquoris in tenuia intestina uberiori effluvio chylum tenuem inspidumque efficiat. Ille dum partim à subsequente chylo, partim peristaltico intestinorum motu, partim musculorum abdominis constrictione in hos omnes ductus propellitur, venarum lactearum orificia subit, quas ubi primùm penetravit, ad mesenterii glandulas statim deferitur, in quibus à spiritibus animalibus subtilior factus, Pecqueti receptaculum pervadit, ex quo cum lymphâ per tubulos thoracicos in venam subclaviam, tandem cordis thalamos ingreditur. Sed quomodo fieri possit, ut chylus, cum sit corpus grave, ad inferiora proinde nitens, hos omnes vasorum anfractus ascendat? Ita ceritè est, & in eo veneranda natura; hic enim chyli ascensus ut à reciproâ abdominis, diaphragmatis, & musculorum respiratori inservientium compressione, ut & ab Aortâ ductus thoracicos pulsante propellitur, sic à frequentibus horumce vasorum valvulis chyli descensum impediētibz urgetur. Sanguinis materia chylus est, qui diu per totum corpus circumfertur. Antequam hujus naturam induat, totus in sanguinem non mutatur, si hujus nomine partem rubram intelligas, sed in humorem crystallinum, qui à chylo distat plurimùm. Postquam multas in pulmonibus subiit alterationes, quibus crassæ & tenaces illius particulæ comminutæ fuerunt, frequentique circuitu alias inutiles ad secretionum organa deposuit, subtilis ipse magis est & elaboratus. Sanguis non est unus simplexque liquor. Quod in ipso rubrum est, cruoris, reliquum feri nomen obtinet. Ille globulis constat, qui continenti motu circa suum axem rotantur; hoc inspissatur igni superpositum, & apta est nutritionis materia: vel nunquam concrefcit, & per sudoris, urinæ, insensibilisque perspirationis vias deferitur. Sanguis perpetuo motu cum chylo volvitur. Suam porrò perfectionem neque in corde viscerum principe, neque in arteriis, sed in pulmonibus, aëris penetratione acquirit. Ruit igitur ea sententia, quæ cordi fermentum aliquod adscribit; sicut ea quæ contendit chylum in sanguinem vasorum angustia & tritu immutari. Sanguis quod è corde remotior est, eò magis niger est, longè tamen secus contingere deberet: unde, inficiabitur nemo mutationem, quam sanguis in pulmonibus subit, ab aëre, quicum penetravit, fuisse profectam. Ab eodem chyli particulæ quædam rotundantur, aliarum tenacitas solvitur, aliarum spirulæ explicantur, donec is rarefiat, spumet, & ebulliat. Quin hic chyli & sanguinis motus vera sit fermentatio, minimè

5

dubitamus; præsertim cum quæ ad illam excitandam requiruntur, in utroque reperiantur omnia. In eo scilicet aër est, qui propter efficacia quæ continet corpuscula, primum ac universale meritò habetur fermentum; Uterque hic liquor spumat, incalescit, dissolvitur; & hæc esse fermentationis effecta quis negaverit? Sanguis si igne chymico resolvatur, salis volatilis plurimum, acidi parum, olei plusquàm aquæ fundit, capite mortuo superflite.

III.

EX eo quòd Paralysis Apoplexiæ succedat, quatenus humor, qui hujus causa erat, in nervos influens, eos obstruit, impeditque quominus id quod è cerebro in nervos influebat, non amplius transmittatur ad motum sensumque præstandum; certè datur liquor, qui continenter per cerebri glandulas secernitur, & qui in nervis contentus ad sensoria organa movetur. Succi nervosi materia est sanguinis sal volatile lymphâ subtiliori etiam dilutum, intra cujus meatus aëris spirulæ latent quamplurimæ, à quibus suam habet resiliendi vim; hinc si appelletur spiritus animalis aut succus nervosus, parum ad nos. Uterque motui & sensui, qui sunt functiones animales, inservit. Quanta sit ipsius virtus è musculorum fortitudine in attolendis summis ponderibus, æstimari potest. Liquor hic nervosus fibras rendit & dilatat, unde secretionum & nutritionis est causa. Sanguis suum per totum corpus motum absolvendo fibrillas pulsatur, earum meatus aperit, intra quos si liquoris crystallini particulæ hæreant, concresecunt, & in earum cedunt alimentum. Crescit corpus quandiu sequaces sunt illius fibrillæ, quæ quòd faciliùs dilatantur, eò majorem, quàm quæ effluxit succi nutritii copiam admittunt. Corpora quorum fibrillæ à naturâ duræ sunt, parùm crescunt; unde quando liquoris copia ei, quæ fuit dissipata, similis est, tunc nulla peragitur accretio. Per corporis nostri glandulas secernitur substantia quædam, quæ quia per vasa lymphatica movetur, humoris lymphatici nomen accipit. Hic chylum in Pecqueti receptaculo, quemadmodum & sanguinem in venam cavam reducem ita diluit, ut faciliùs cor & pulmones penetret, novam in iis fermentationem subiturus. Fibræ quibus constat machina corporea, ita inter sese nectuntur & complicantur, ut poros ubique efficiant, qui in eâ sunt copiâ, ut cribrum esse corpus nostrum dicas, per quod continenter expurgantur humores. Quamobrem sanguis ad extremas partes, seu ad corporis spiracula delatus magis ac magis attenuatur, & à cruore uberius separatur; quo fit, ut accelerato ipsius circuitu, celebriùs per glandulas protrudatur, quàm ut à venis excipi queat; & is dum intra glandulas moratur, uberiori copiâ secernitur per tubulos, ex his ad

cuticulam extensos pénétrat. Perspirationis materia sunt sanguinis succique nervosi particulae, quæ frequenti fermentationis motu eam tenuitatem sunt adeptæ, ut per cutis glandulas secerni, & per harum ductus sensim sine sensu excerni possint. Perspirationis causa est respiratio: aëris enim particulae per sanguinem diffusæ propter suam tenuitatem & pernicitatem per corporis canaliculos foras non redduntur, quia illius particulas, quæ longâ fermentatione fuerunt resolutæ, secum abripiant; hinc respirationis intensissimæ perspirationis certa est proportio, ita ut animalia calidiora, ut alius respirant, sic copiosius perspirant. Bilis sale alkali fixo & volatili, oleoque potissimum constat. Ipsius materia sanguis est, qui à venâ portâ ad hepar defertur. In eo enim versatur discriminis ratio hepatis & aliarum partium in quibus humores secernuntur, quod sanguis in has per arterias, in hepar per venas afferatur: sic igitur separatur. Sanguinis particulae, quæ cum hepatis glandularum poris conveniunt, per eos trajiciuntur, trajectæ peculiare tubulos subeunt, per quos in vesiculam felleam, & in ductum *choledochum* delatæ ipsius contractione in duodenum propelluntur, ubi loci statim atque pervenire appellantur chyli, & sanguinis balsamum.

IV.

COR verus est musculus, qui continuâ dilatatione & constrictione gaudet. Quando dilatatur cor, sanguinem ex ipsis auriculis recipit: cum verò contrahitur, eundem à ventriculis suis propellit in arterias: sic fit cordis motus. Sanguis utrumque ventriculū vix ingressus est, ut fibras tendinosas irriter, earumque elaterem intendat: ab hoc dum carnosæ comprimuntur, retardatur illius circuitus, fibræ omnes contrahuntur, mucro ad basim accedit. Ubi verò sanguis hanc ipsam contractione Aortam, arterias coronarias, fibras carnosas pervasit, tendinosarum superatur elater, restituitur sanguinis motus, mucro à basi recedit, donec sanguis recens in utrumque ventriculū influxerit. Cordis auriculæ cum in earum motu contrahantur, fibrisque muscularibus donentur, veri sunt muscoli. Qui circa lavam papillam percipitur cordis motus, sinistri est ventriculi, qui cum in sua systole contorqueatur, pectus percussit. Cordis contractione sanguis per totum corpus diffunditur. Arteriæ tubuli sunt, qui à sanguine eò usque dilatantur, donec peractâ cordis systole sanguis in arterias non amplius protendatur; tunc temporis enim elatere suo in pristinum statum restituuntur. Cum sanguis solâ cordis systole arterias pervadat, illius in diastole sisteretur circuitus, nisi earum contractione ulterius propelleretur. Inde est quod arteriæ, lienis & aliarum partium, in quibus vasorum numerus,

flexuræ & implicationes sanguinis circuitum retardarent, ad hunc incitandum fibræ plurimis instructæ sunt. Eadem de causâ tam ascendens quàm descendens aortæ truncus, in quo sanguinis pondus ad caput ipsius motui resistit, fibræ pluribus pariter contextitur. Eundem in finem pulsant venæ. Verùm quia fibræ in his quàm in arteriis pauciores sunt, minor est illarum pulsus, ita ut in venâ tantùm cavâ conspiciatur, eoque fortior sit, quò ea propius ad cor accedit, quia sanguinis copia major est propulsanda. Ex eo quòd lentus sit per venas portæ sanguinis circuitus, ad hunc per ingentem ac densam hepatis molem accelerandum, capsula, quæ venæ portæ & arteriæ communis est, alternis contrahitur & dilatur. Arteriæ cordis motum proximè sequuntur. Quando cordis pulsus parvus est vel magnus, arteriæ parùm vel fortiter pulsant: cùm enim cor, aorta, & qui ex eâ ducuntur rami, ab eo plexu qui circa cordis basim situs est, suos mutuuntur nervos, quando copiosi & vegeti spiritus in eundem influunt, fortiter pulsat cor, micant arteriæ; languet verò cordis arteriarumque pulsus, quando paucique hebetes feruntur.

V.

FIBRARUM è quibus constat uterus, textura ita comparatur, ut quando ad debitum pervenit incrementum, salis cujusdam particulas è glandulis excerpant, quæ intra fibræ collectæ sensim effervescent, suumque tum utero & liquoribus per ipsum fluentibus fervorem communicant. Ab eo uteri moles augetur, vasa dilatantur, & sanguis diffunditur suis conceptaculis coerceri impatiens. Fervor ille statis periodicis recurrens, efficit ut fluxum sanguinis singulis mensibus producat, qui idcirco menstruus dicitur. Hæc ergo menstrua purgatio non à lunâ, sed ab uteri fervore repetatur, quemadmodum & à fermento; ipsius enim præsentia hanc persentiunt solæ mulieres & simiæ; & eo absterfo, quia temperatur uteri fervor, uterus in pristinum statum restituitur, nisi salinæ sanguinis particulae positæ iisdem circumstantiis in utero congerantur, coldem effectus producturæ. Purgatio illa circa decimum-quartum ætatis annum erumpit. Eo tempore vegetiore factâ sanguinis fermentatione, per patentes uteri meatus salinæ fermenti particulae uberiori copiâ secernuntur. Instante verò senectute deservescit sanguis, concidunt uteri meatus, nulla fit secretio. Quia in gravidis & lactantibus maximè immutatur uteri textura, hæc menstruam purgationem non patiuntur, antequam uterus fuerit in integrum restitutus: Lactis materia non est suppressa purgatio menstrua, sed chylus, qui per mammarum glandulas à sanguine separatur, & intra earum tubulos ad infantis nutritionem colligitur. Cui

autem in lactantibus solis & gravidis mulieribus lac reperiatur, nondum certo liquet: unde alii istius effectus causam in fortem marris imaginationem de foetu nutriendo sollicitæ; alii in novam partium genitalium constitutionem refundunt; quam quidem posteriorem amplectimur: quia tunc temporis cum libidinis æstro percitæ sint animantes, in partibus illis novus procreatur liquor, cujus corpuscula cum sanguine partes illas præterfluente permixta corporis fermenta exaltant. Præterquam quod pili per totum corpus erumpunt, vox exasperatur, mulierum mammae inflari incipiunt, proindeque earum tubuli patentiores sunt, non ita tamen, ut chylū à sanguine secernere queant; sed ut menstrua purgatio eo ipso tempore, quo mammae tumere incipiunt, contingat. Consequens est ab eodem uteri fermento menstruam purgationem ac mammarum tumorem oriri. Pleisque enim mulieribus quando menstrua purgatio erumpit, toto hoc tempore mammae tument. Si plures virginum morbi matrimonio tutius & citius sanentur, quàm quibuscumque aliis remediis, desine mirari. E maris semine per testes secreto, & intra uterum recepto, elata corpuscula sanguinem penetrant, ac cum ipso per totum corpus diffusa omnium liquorum temperiem immutant. Illa efficaciora sunt, si mulier concepit, quàm irritō congressu; unde mammarum poros ita dilatant, ut chylum secernere possint. Generationis ope propagatur genus humanum, suscipitur proles, creantur liberi. Sed quomodo illa pergatur, adhuc sub iudice lis est. Qui tamen asserit corpus humanum ex ovo in muliere contento generari, is probabilis conjecturâ ducitur.

*Hæc suas Theses proponebat ROBERTUS JULIANUS. LHOSTE, Valloniensis,
Artium Magister, die Sabbathi septimâ Decembris,
A. R. S. H. M. DCCXV, ab hora octava ad meridiem.*